

DOMINGU XIX TEMPU KOMÚN – TINAN B

Ema hanoin hetan nia-an katak nia ki'ik liu iha mundo rai-klaran, nia sente-an katak nia la' o dadaun ba fatin ne'ebé nia hatene. Ema sarani moris iha fiar; laran-metin ba Maromak nia Moruk, la' o ho laran moos no di'ak ba moris hi'as. Hodi fiar; ema senti-an, iha nia susar no iha nia moris." Lahó Ha'u imi sei la halo buat ida". Na'i nia prezensa, hatudu loloos duni ona iha selebrasaun Eukarístika no iha haklaken nia Futar Lia. Fiar la hasai husi ema sarani susar laron ba laron nian, maibé hato'o ba nia, hein ho laran metin ba manán buat di'ak tebes nian, hasoru aat, domin hasoru ódio, moris hasoru mate. Neon metin ida ne'e buras hela iha fiar; sei lori ita ba laran metin kmanek wa'in tebes ida kona ba Na'i nia hakaran.

Iha domingu, ita halibur hamutuk iha família fiar nian, ita simu Maromak nia grasa hodi bolu Maromak ho naran Aman ne'ebé iha don Espiritu Santo nian ba nia oan sira. Iha Aman Maromak deit ne'ebé bele haraik fiar no forza atu bele hasoru akontesimentu oinoin iha moris no iha istória ho hakmatek. Hakmatek la'ós dehan katak laiha difikuldade no terus, maibe ho fiar metin katak Na'i besik ho ita nafatin, Nia akompañia nia kreda ne'ebé halo hela peregrinasaun iha mundu ida-ne'e, liuhusi dalan kontemplasaun iha Kristu. Ita bá Igreja atu bele haboot ita-nia hakaran ba uma lalehan nian, la'ós atu sai boot iha mundu ida-ne'e maibé, buka atu moris nu'udar Maromak nia oan loloos.

Komentáriu ba primeira Leitura (1 Rs. 19, 4-8)

Iha primeira Leitura haktuir mai ita kona ba Elias nia viajen laron tomak, iha rai fuik maran. Elias, loos duni hetan terus no kole, laiha esperansa atu bele kontinua nia viajen, nune'e halo desizaun ida hodi hein de'it mate. Maibé Maromak ne'ebé moris iha kbiit ba buat hotu, laron ida mai ba povu Ézodu sira ho Maná no halo bee ne'ebé sai husi fatuk, Maromak ne'e la husik nia oan ida mesak. Maske ita iha impresau hodi hela mesak, no iha kbiit kona-ba ita-nia destinu, Maromak nafatin boot no ukun ita.

Ohin ita iha paun rai-fuik maran nian, Maromak kontinua fó han ita husi Eukaristia ne'ebé hatudu loloos Jezús Kristu nia Isin, no iha Nia bee, ne'ebé mai husi don Espiritu Santu nian. Ita bele hasoru moris ho fiar hodi halo dalan to'o iha Maromak nia Foho santu, to'o konkluzau ikus nian hodi bele haree malu ho ita-nia Na'i oin ho oin.

Komentáriu ba segunda Leitura (Ef. 4, 30-5,2)

Saun Paulo konvida ita ida-idak atu keta halo Maromak nia Espiritu Santu laran-susar, basá, Nia tau hela ona sinál ba ita, atu to'o laron, Nia soi ita, husu ba ita atu halakon tiha husi ita leet ita nia hirus malu, ita-nia laran nakali, ita-nia lian maka'as, ita-nia hotar malu. Ita halakon tiha husi

ita leet, ita nia-laran aat tomak. Ita buka laran di'ak ba malu, sadia malu, perdua malu, nu'udar Maromak perdua ita tan Kristu. Tan ne'e ita buka hadomi malu di'ak liután, hanesan Kristu rasik hadomi Ita, to'o saran Nia-an ba mate tan ita.

Maluk sira iha loron Batizmu nian, hatudu mai ita katak sai nu'udar ita nia loron libertasaun nian, Pákua nian. Iha loron ne'ebá ita simu Espíritu Santu, halo ita hola-parte iha família Maromak ninian. Apóstolu Paulo husu mai ita sarani sira atu la hado'ok-an husi Nai nia Espiritu. Ba Paulo Espíritu triste liu bainhira ita falta karidade ba malu, bainhira ita do'ok husi Maromak, hetan problema, taka-an iha sentimentu sira ne'ebé la hatene perdua. Hatudu komportamentu hanesan ne'e tanba laiha koerénsia ba Kristu nia domin. Signifika katak la tuir Nai nia laran-sadia no sakrifísiu ne'ebé Jezús rasik hodomi hodi fó nia-an rasik mai ita. Ita haksolok ho Espíritu Santu, hodi renova fali ita-nia sakrifísiu perdaun nian, tuir dalam loos ne'ebé Kristu rasik hanorin hela mai ita.

Komentáriu ba Evanjellu Jo. 6, 41-52 (41-51)

Evanjellu ohin nian haklaken mai ita kona-ba ema Judeu sira murmura hasoru Jezús, tanba Nia dehan: ” Ha'u, ai-han tun husi lalehan“. Sira hateten: ” Nia la'ós Jezús, José nia oan? Judeu sira iha pergunta lubuk ida kona-ba Jezús tanba sira la fiar, sira-nia fuan toos hasoru Maromak nia liafuan, la husik atu Maromak nia grasa gia sira-nia moris. Iha significadu seluk: sira la fiar, hanesan loloos akontesimentu iha antigu dezertu nian. Nune'e, sé mak fiar simu Kristu ” Paun moris nian, tun husi Lalehan”, saran ba mundu hodi salva ema barak. Ita simu ho fiar ” Eukaristia”. Fiar mak kondisaun ne'ebé primeiru liu hola parte iha Nai nia meza, iha estabilidade ho Jezús iha nia Mistériu katak sai Maromak Nia oan ne'ebé Aman Maromak mak haruka mai. Sé mak fiar hetan moris rahan laek.

Reflesaun badak

Bainhira ita-nia fiar fraku, kria lia-husun oioin, tanba laran-moras lakohi atu ema seluk liu ita, buka meius oioin atu bele hatún ema seluk, laiha fuan agradese nian, tau iha hanoin protesta no krittika sira ne'ebé la tulun atu bele harii comunidade Maromak nian. Ita harohan atu bele hetan grasa iha dalam konversaun nian hodi hametin ita-nia fiar iha realidade moris nian.

Ita haree oinsa Maromak hadomi Elias, hodi fó han no hemu iha momentu susar no laran-taridu nian. Maromak la husik nia povu hela iha terus laran, Nia mai iha tempu loos. Hanesan buat ne'ebé Nia halo ba Elias. La husik Elias mate maski Elias hakarak mate, ema nia planu loos duni la hanesan Maromak nian. Haree fali ba ita ida-idak nia moris, ita mós iha esperiénsia barak kona-ba Maromak nia domin mai ita iha akontesimentu oioin. Tan ne'e ita hahí no agradese ba Maromak ne'ebé prontu nafatin hodi tau matan no hakiak ita iha mundu ne'e.

Maromak nia hakarak atu nia povu hetan salvasaun, réal ne'ebé dehan katak Ninia An rasik maka Paun ne'ebé mai husi Lalehan.

Buat ne'ebé ba ita loos no firme katak laho Jezús ita dook husi salvasaun no moris rohan-laek. Ita buka tau buat ne'ebé importante iha ita-nia moris loroloron.

Harohan: Gia ami Nai, ba ita-nia Kreda peregrina hela iha mundu ne'e, tahan ami ho ita-nia forsa ho ai-han ne'ebé sei la lakon, tau fiar metin iha Kristu hodi kontempla Nia oin ne'ebé nabilan. Haboot ami-nia fiar iha akontesimentu oinoin ne'ebé ami hasoru iha mundu ida ne'e.